

1 JON

Jon Gigirum Meuma Desiroma

Inaiinai Gaiyawa

1 ¹Me namui ren wakene. Nu me anotuwa, nu me yangunup yautuwa, sira naninup me yumtu. Me Inaiinai Gaiyawa, me gae meuma oya vete. ²Inaiinai mame uwane nu yautu. Meoya me gumbe nu taibe atu sira nu inaiinai yaibobot mame wak diruita. Me Mamunwa gumbe wakene, sira me nu gunup uwanewa. ³Nu wak diruita ye guniyap me nu yautuwa ge anotuwa. Me gumbe ye mina meis wakewake desirom me nu gaibu. Sira wakewake desirom numawa me Mamanwa gaibu sira Usiwa Iesu Keriso gaibu. ⁴Kuiyawa nu mame teete me ainampe degadega numa koka noidauwape.

Eyawa Gumbe Anigimtanwa

⁵Mame me umum nu anotu, sira me ye diruiete, God me eyawa, me danave sisip da den di wakene. ⁶Nu vete nu God gaibu wakewake desirom, go sisip dana angetewa, me nu uga vete, sira ano natawa gumbe den wakeete. ⁷Megara, God me eyawa gumbe wakene mina, nu eyawa gumbe anigimta ipewa, nu iyayapan upeba wakewake desiroma garawan gaibu, sira Usiwa Iesu diyawa gumbe kukaeba numa undag wad muin numpe.

⁸“Nu kukaeba numa da onan,” nu meis wata ipewa, nu numbovit uga vete, sira ano natawa nu gunup onan. ⁹Kukaeba numawa nu taibe boru watawa, God me anotumat ge oraimina, meoya God kukaeba numawa anog yankwepe sira me ano kukaeba undag wad muin numpe. ¹⁰“Nu kukaeba da den atu,” nu meis watawa, nu wata God uga waiviwa sira gae meumawa danunup onan.

^a 1:1 Jon 1:1 ^b 1:2 Jon 1:14 ^c 1:4 Jon 16:24 ^d 1:5 1Ti 6:16; Jms 1:17 ^e 1:6 1Jn 2:4
^f 1:8-9 Sam 32:5; Pro 28:13

2 ¹Ne utunaiwa, mame ne yenan teeni, me ye kukaeba den atan oya. Da bira kukaeba apewa, Apan da me Mamunwa namive nunan oya papara vintan gae waiviwa wakene. Me Iesu Keriso oraivitwa. ²^hApan mame me kukaeba anog yankwetan puyo maeba nu kukaeba numawa oya, sira kukaeba numawa mekut onan piyu mame kukaeba muma undag oya.

³Nu Gwangwan meuma yumnattuwa, oma ane wata nu God yaug anotu. ⁴Apan da mamaib wape, “Ne God yaug anona,” megara me God Gwangwan meuma gumbe den nau aigimpewa, me uga abnawa, natawa me gumbe den wakene. ⁵ⁱMegara bira da gae meuma noiwa aupewa, God baigan meuma natawairan me gumbe noidauwape. Mame gumbe nu yaug anotu nu God danave. ⁶Bira da me wapewa, “Ne God danave.” Me wakegimpe Iesu aine mina.

⁷^jOwanaiwa. Ne Gwangwan mataiwa yenan den teeni. Me Gwangwan nunganwa me wait utu namuiren anoyanawa. Gwangwan nunganwa me Gae me ye wait anoyanawa. ⁸^kMegara gare ne Gwangwan mataiwa mina yenan teeni. Me natawa Keriso gumbe, sira ye guniyap gaibu. Kuiyawa aram sisip uwag aine sira natawa eyawa me wait esine.

⁹^lDa bira aib wape, “Ne eyawa gumbe wakena.” Megara me tatawa gumbe topai apewa, me ande aram sisip dana wakene. ¹⁰^mDa bira tatawa gumbe baigan aiviwa, me eyawa gumbe wakene, sira den aippe. ¹¹ⁿDa bira tatawa gumbe topai aiviwa, me aram sisip danave wakene, sira me aram sisip danave gigivi. Me den yaug anone me ampa aivi, kuiyawa aram sisip me yangawa tobodne.

¹²Ne utuntainanwa. Ne yenan gigirum teeni, kuiyawa kukaeba yeuma Ayapan iviwa gumbe anog yankwene.

¹³Mamanaiwa. Ne yenan gigirum teeni, kuiyawa ye yaug anoyana utupa namuiren wakenewa.

Ud mataiwa. Ne yenan gigirum teeni,

kuiyawa ye kukaeba abnawa gumbe garawa auyana.

Ud usiusi neuma. Ne yenan gigirum teeni, kuiyawa ye Mamunwa yaug anoyana.

¹⁴Mamanaiwa. Ne yenan gigirum tena, kuiyawa ye Mamunwa yaug anoyana utupa namuiren wakenewa.

Ud mataiwa. Ne yenan gigirum tena, kuiyawa ye yusiyusi ene,

God gae meuma ye guniyap wakeivi, sira ye kukaeba abnawa gumbe garawa auyana.

^g 2:1 Ibr 7:25-26 ^h 2:2 Jon 1:29; 1Ko 1:20; 1Jn 4:10 ⁱ 2:5-6 Jon 14:21,23

^j 2:7 Jon 13:34; 2Jn 5-6 ^k 2:8 Jon 1:9; Rom 13:12 ^l 2:9 1Jn 4:20 ^m 2:10 Rom 14:13

ⁿ 2:11 Jon 12:35

Piyu Mame Gumbe Baigan Den Aya

¹⁵°Piyu mame go divi da piyu mame danave wakenewa gumbe baigan den aigimiya. Da bira piyu mame gumbe baigan aigimpewa, me Mamunwa gumbe baigan den wakene. ¹⁶°Dividivi undag piyu mame danave wakenewa—apan ano kukaeba imive anoiviwa, yangut yanga visive aiviwa, sira inaiinai waiya waiyaeba aivi me aninin wakeiviwa—anoano mame Mamunwa gumbe den onne, me piyu mame apa onne. ¹⁷°Piyu mame ge anoano meuma matai onanape. Megara bira da God anoano meuma gumbe aiviwa me wakeigimpe yaibobot.

Keriso Anaviyawa

¹⁸°Utuntainanwa, kum mame kum oieba. Ye wait anoyana Keriso anaviyawa di onivi. Gare mina Keriso anaviyawa obiren wait uwaya. Mame gumbe nu yang anotu kum mame kum oieba. ¹⁹°Mu nu gunup dauwag amiya, go mu numawa da onan di. Mu numawa ipawa, mu nu gunup wakepono. Mu amiyawa me taibe ane, mu undag numawa da onan.

²⁰°Ye undag ano natawa yang anoyana, kuiyawa Iyakaisiyapama Abnawa me oira egeyap areriyane. ²¹°Ne ye guniyap gigirum teeni, kuiyawa ye ano natawa anoyana. Ye den yang anopono ipawa, den tepopo. Sira gae uga me gae natawa gumbe den onivi. ²²°Gae uga abnawa me bira? Uga abnawa me apan bira aib waivi, “Iesu me Keriso onan.” Me gae uyai wane Mamunwa ge Usiwa oya. Mame Keriso anaviyawa di. ²³°Bira da Usiwa gumbe uyai waiviwa me Mamunwa den aune. Bira da me Usiwa oya taibe wapewa me Mamunwa gaibu aupe.

²⁴°Yaiyai yang anoya, ande gae namuiaren anoyana me ye daneyap barauya wakepe. Meib wakepewa, ye mina meib matai ande wakeya Usiwa ge Mamunwa gumbe. ²⁵°Mame inaiinai yaibobot me Keriso membo agi nunnewa.

²⁶°Ne gimirum mame yenan teeni iyayapan oya, mu yenan namuyoiyoi eme gae uga muma gumbe. ²⁷°Sira yenan oya, Keriso oira egamnewa me ye auya, sira me ye daneyap ande wakeivi. Meoya ye imuyap den wakene bira da wag toyau yempe. Kuiyawa oira meumawa me ye wag toyau yempe dividivi undag oya, sira me toyau yennewa me natawa di, me uga onan. Me ye wag toyau yenne mina Keriso gumbe wakeigimiya.

God Usitainawa

²⁸°Sira gare, utuntainanwa, Keriso gumbe yunat aisiya. Matai me uwapewa nu ano yusiyusi ata, sira kum me uwapewa me namive ubmam

° 2:15 Rom 8:7 ° 2:16 Rom 13:14 ° 2:17 Mat 7:21 ° 2:18 Mat 24:5,24; 2Jn 7 ° 2:19 Apa 20:30

† 2:20 1Ko 2:15; 2Ko 1:21; 2Jn 2 † 2:22 1Jn 4:3; 2Jn 7 † 2:23 Jon 5:23; 1Jn 4:15; 5:1

‡ 2:27 Jon 16:13

den ata. ^{29x}Me oraivitwa me ye yaug anoya ipewa, ye yaug anoya da bira oraiwa aiviwa me gumbé yaine.

3 ^{1y}Ye anoya baigan kokawa aninin Mamunwa nu nunne. Nu aib wata nu God usitainawa. Natawa di nu gare meib. Piyu mame nu den yaug ano nunne, kuiyawa mu Mamunwa den yaug anoya. ^{2z}Iyayapan neuma, nu gare wait God usitainawa, go nu yaiyai den yaug anotu nu matai aninin aton. Megara nu yaug anotu Keriso uwapewa nu me mina ata, kuiyawa me apa nu me irawa di yauta. ³Bira da me Keriso gumbé owanowan mame aupewa, me Keriso esine mina me membovit esipe.

⁴Bira da me kukaeba aiviwa me Gwangwan togomiyaivi. Kuiyawa kukaeba me Gwangwan togomiyatanwa. ^{5a}Ye yaug anoyana Keriso kukaeba aug aitan uwane. Keriso gumbé kukaeba da den wakene. ⁶Bira da Keriso gumbé wakenewa, me kukaeba gumbé den aigimpe. Bira da kukaeba gumbé aigimpewa, me Keriso den yaune sira den anone.

⁷Ne utunaiwa. Bira da den ape gae uga gumbé ye namuyoiyoi aiyempe. Bira da oraiwa apewa, me Keriso mina oraivit. ^{8b}Bira da kukaeba gumbé aigimpewa, me Seitan gumbé onne. Kuiyawa Seitan kukaeba aivi utupa namuiren. God Usiwa uwane, kuiyawa Seitan nauwawa me watkukampe onan di ape. ^{9c}Bira da God gumbé yainewa, me matai kukaeba gumbé den aigimpe. Kuiyawa God yawa meuma me danave wakene. Me oma den ane kukaeba gumbé aigimpe. Kuiyawa me God gumbé yaine.

¹⁰Mame gumbé nu yaug anotu nu God usitanawa go Seitan usitainawa. Bira da oraiwa den apewa me God meumawa onan, sira tatawa gumbé baigan den apewa me mina meib.

Baigan Garagara Aya

^{11d}Nu baigan garagara apono. Gae mame ye wait anoyana me utupa namuiren onne. ^{12e}Kein mina den aya. Me kukaeba abnawa gumbé onne gwaneba tone botone. Divi oya me tone? Kuiyawa me membo anewa me kukaeba sira gwaneba anewa me oraiwa. ^{13f}Tatangwanen, piyu mame topai yempe ipewa, den teraya. ^{14g}Nu yaug anotu nu bo yankweg inaiinai gumbé uwatu, kuiyawa nu tatanaiwa gumbó baigan ete. Bira da baigan den apewa me bo gumbé wakene. ^{15h}Bira da tatawa topai apewa me apantoto, sira ye yaug anoyana apantoto gumbé inaiinai yaibobot den wakene.

¹⁶ⁱIesu Keriso inaiinai meuma baraune nunan oya. Mame gumbé nu yaug anotu baigan me aninin. Sira inaiinai numa barautanit di tatangwanenaiwa munan oya. ^{17j}Bira da tawara aupe, sira yaupe tatawa

^x 2:29 1Jn 3:10 ^y 3:1 Jon 1:12-13; 16:3 ^z 3:2 2Ko 3:18 ^a 3:5 Jon 1:29; 1Pi 2:22-24; 1Jn 2:2

^b 3:8 Jon 8:44 ^c 3:9 1Jn 5:18 ^d 3:11 Jon 13:34 ^e 3:12 Gen 4:8 ^f 3:13 Jon 5:18-19

^g 3:14 Jon 5:24 ^h 3:15 Rev 21:8 ⁱ 3:16 Jon 13:1; Gar 1:4 ^j 3:17 Deu 15:7

me dividivi anoivi, megara danadawai me gumbé onan ipewa, aninin oma ane God baigan meuma me gumbé wakene? ¹⁸^kUtuntainanwa. Gae go gae vetewa gumbé baigan den ata, megara nau ge natawa gumbó gaibu baigan ata. ¹⁹Mame gumbé nu yaug anotu nu natawa gumbé waketu, sira nu God namive yum autu. ²⁰Anten matai nonunmagawa pui yunumpe ipewa, danadawai den auta. God me kokavitwa nonunmagawa kusi, sira me dividivi undag yaug anone.

²¹^lIyayapan neuma, nonunmagawa pui den yunumpe ipewa, nu oma ane ano yusi God namive anta. ²²Sira dividivi undag nu me gumbé nun watawa auta. Kuyawa nu me gwangwan meuma autu, sira dividivi me degadega apewa nu ete. ²³^mGwangwan meme. Nu Usiwa Iesu Keriso iviwa gumbé anotumat ata, sira me yusipamit didnunnewa mina baigan garagara ata. ²⁴ⁿBira da me God Gwangwan meuma aupewa, me me danave wakeivi, sira God me danave wakeivi. Sira mame gumbé, nu yaug anotu God gunup wakeivi Guwawa nu nunnewa gumbé.

Guwawa Natawa Ge Guwawa Uga

4 ¹^oOwanaiwa. Guwawa upeba gumbé tate anotumat den aya. Guwawa ag yauya me God gumbé onne go onan, kuyawa uga propeta obiren dauwag piyu mame gumbé uwaya. ²^pGuwawa undag mu Iesu Keriso kwapiwa nu minun uwane taibe wapewa mu God gumbé onamiya. Me gumbé ye yaug anoya me God guwawa meuma go onan. ³^qMegara guwawa undag Iesu me God gumbé onne den taibe vemewa, mu God gumbé den onamiya. Mame me Keriso anaviyawa guwawa meuma. Ye anoyana me onivi, sira piyu mame danave wait uwane. ⁴Utuntainanwa, ye God gumbé oniyana. Ye mu gumbó garawa auyana. Kuyawa Apan da me ye daneyap wakenewa me kokavitwa, sira apan da me piyu mame danave wakenewa me kusikaren. ⁵^sMu piyu mame gumbé uwaya, meoya mu piyu anoano meumawa veme, sira piyu mame noiwa anoya. ⁶Nu God gumbé onantu. Da bira God yaug anopewa me nu gae wata anope. Megara da bira nu gae wata den anopewa me God gumbé den onne. Mame gumbé nu yaug anota me Guwawa natawa go guwawa uga.

God Me Baigan

⁷Owanaiwa. Baigan garawan ata, kuyawa baigan me God gumbé onne. Da bira baigan aiviwa me God gumbé yaine, sira God yaug anone. ⁸Da bira baigan den aiviwa me God den yaug anone, kuyawa God me

^k 3:18 Jms 2:15-16 ^l 3:21 Ibr 4:16 ^m 3:23 Jon 6:29; 13:34 ⁿ 3:24 1Jn 4:13

^o 4:1 Mat 7:15; 1Te 5:21; 1Jn 2:18; 2Jn 7 ^p 4:2 1Ko 12:3 ^q 4:3 1Jn 2:18 ^r 4:4 Mat 12:29; 1Jn 5:4-5 ^s 4:5-6 Jon 8:47; 15:19

baigan. ⁹God me Usiwa desiromiren baraune onne piyu mame gumbe, nu me gumbe inaiinai autan oya. Mame gumbe God baigan meuma nu gunup toyau nunne. ¹⁰Mame me baigan. Nu God gumbe baigan etewa onan. Megara God baigan meuma nunne nu gunup, sira me Usiwa baraune onne me kukaeba numawa oya kukaeba anog yankwetan puyowawa ane. ¹¹Owanaiwa. Wait God baigan anunnewa, nu mina meis baigan garawan atanit di. ¹²Bira da God den di yaune. Megara nu baigan garawan atawa, God nu gunup wakene, sira baigan meuma me nu gunup noidauwape.

¹³God Guwawa meuma nunne. Mame gumbe nu yang anotu God danave wakeete, sira God me nu gunup wakeivi. ¹⁴Nu yautu sira iyayapan toyau munetewa, Mamunwa me Usiwa baraune onne piyu mame Waita Abnawa atanwa oya. ¹⁵Da bira wapewa, “Iesu me God Usiwa,” God me gumbe wakeivi, sira me God gumbe wakeivi. ¹⁶Meoya nu yang anotu God baigan kokavit nunne, sira nu me gumbe anotumat atu.

God me baigan. Da bira baigan gumbe wakenewa me God gumbe wakene, sira God me gumbe wakene. ¹⁷Mame gumbe, baigan me noidauwane nu gunup. Meoya nu ano yusiwa auta keptete kumiwa apa. Kuyawa nu piyu mame apa Keriso mina atu. ¹⁸Baigan gumbe a den wakene. Baigan oraiminavit a aug epa aorene. Kuyawa a me garawa kukaeba gumbe ape. Da bira a aigimpewa, baigan meuma oraiminavit onan.

¹⁹Nu baigan ete. Kuyawa God namu baigan nunne. ²⁰Da bira wape, “Ne God gumbe baigan eni,” go me tatawa topaiapewa, me ugaeb atatu. Da bira me tatawa me oma ane yangave yaunewa gumbe baigan den niyapewa, me God me oma den ane yaunewa gumbe oma den ane baigan aivi. ²¹Da bira God gumbe baigan apewa, me mina tatawa gumbe meis baigan atanit di. Gwangwan mame Keriso nunne.

Anotumat God Usiwa Gumbe

5 ¹Da bira Iesu me Keriso anotumat aiviwa, me God gumbe yaine. Sira da bira Mamunwa gumbe baigan aiviwa me usitainawa gumbo meis baigan ape. ²Mame gumbe nu yang anotuwa, nu God gumbe baigan ete sira Gwangwan meuma auetewa, nu God usitainawa baigan amunete. ³Nu God gumbe baigan atawa, me natawa me nu Gwangwan meuma amarete. Sira Gwangwan meuma me nu gunup ibnawa koka onan. ⁴Kuyawa da bira God gumbe yaipewa, me piyu mame gumbe garawa aupe. Sira anotumat numa me piyu mame gumbe garawa aupe.

¹ 4:9 Jon 3:16 ² 4:10 Rom 5:8-10; 1Jn 2:2 ³ 4:12 Jon 1:18 ⁴ 4:13 2Ko 1:22; 1Jn 3:24
⁵ 4:21 Mak 12:29-31 ⁶ 5:1 1Jn 4:15 ⁷ 5:3 Jon 14:15,23-24

⁵Bira piyu mame gumbe garawa aupe? Me Iesu me God Usiwa anotumat aiviwa.

⁶Iesu Keriso mame me yoi ge ganigani gumbe uwane. Me yoi mekut onan, yoi ge ganigani gumbe uwane. Sira Guwawa me taibe ane. Kuyawa Guwawa me ano natawa. ⁷Taibe anewa me duwamdesi. ⁸^bMu Guwawa ge yoi ge ganigani. Duwamdesi mame mu desirom ane. ⁹^cNu apan taibe atanwa auta, sira God taibe atanwa me egave natawa kokavit. Kuyawa God taibe atanwa me Usiwa oya. ¹⁰^dBira da God Usiwa gumbe anotumat apewa, taibe atanwa mame me nonemagawa gumbe. Bira da God gumbe anotumat den apewa, me God uga abnawa ape. Kuyawa God Usiwa oya taibe wanewa me anotumat den ane. ¹¹God inaiinai yaibobot aug nunne, sira inaiinai mame Usiwa gumbe wakene. Mame me taibe atanwa. ¹²^eDa bira me Usiwa aunewa me inaiinai aune, sira da bira God Usiwa den aunewa me inaiinai den aune.

Inaiinai Yaibobot

¹³^fYe God Usiwa iviwa gumbe anotumat ene, meoya ne dividivi mame yenan teeni, me inaiinai yaibobot wait auyanawa ye yaug anotan oya. ¹⁴^gDivi da God anoiviwa gumbe ditawa God me nunan anope. Nu ano yusi autu God gumbe angetewa. ¹⁵Sira divi da nu ditawa God nunan anoivi, nu me yaug anotawa, nu yaug anota divi da nu dituwa God numpe.

¹⁶^hDa bira tatawa kukaeba aivi, sira kukaeba meuma me bo ebuwawa den aine, me yaupe ipewa, God gumbe menan nun waya. God matai inaiinai wampe. Meoya ne veni iyayapan mu kukaeba eme, sira kukaeba mumawa bo ebuwawa den amiyawa, God me matai inaiinai mu mumpe. Kukaeba me bo ebuwawa aipewa wakene. Ne aib den veni kukaeba mame oya nun waya. ¹⁷Gwambe emewa undag me kukaeba, go kukaeba da wakene me bo ebuwawa den aipe.

¹⁸ⁱNu yaug anotu da bira God gumbe yainewa me kukaeba den yunat aigimpe. God Usiwa me yumnatpe, sira apan kukaeba me oma den ane me gumbe anin ape. ¹⁹Nu yaug anotu nu God usitainawa, sira piyu mame undag me airapu kukaeba amaraivi. ²⁰Megara nu yaug anotu God Usiwa uwane, sira me ano nunivi nu yaug anotu God natawa. Meoya nu God danave wakeete, kuyawa nu Usiwa Iesu Keriso gumbe wakeete. Me God natawa sira inaiinai yaibobot.

²¹Utuntainanwa. Yembovit amat yaimoyai aya god ugaugaeba gumbo.

^a 5:6 Jon 1:29-34 ^b 5:8 Jon 15:26 ^c 5:9 Jon 5:32-37 ^d 5:10 Jon 5:36-40

^e 5:12 Jon 3:36 ^f 5:13 Jon 20:31 ^g 5:14 Jon 14:13-14; 1Jn 3:21-22 ^h 5:16 Mat 12:31

ⁱ 5:18 1Jn 3:9